

Ambil pengajaran sejarah Ramadan – Najib

UM-18/10/2006

PEKAN 17 Okt. – Timbalan Perdana Menteri, Datuk Seri Najib Tun Razak menasihatkan umat Islam agar mengambil pengajaran daripada beberapa peristiwa penting yang berlaku sepanjang Ramadan pada zaman Rasulullah untuk muncul sebagai umat yang berjaya.

Beliau berkata, selain membuka ruang untuk beribadat dengan lebih tekun, Ramadan turut mengandungi unsur pendidikan yang besar.

Najib menarik perhatian antara teladan terpenting yang tersirat dalam sejarah Ramadan ialah sifat sabar yang menjadi punca kemenangan umat Islam dalam Perang Badar dan sikap tidak bersabar yang menjadi punca kekalahan dalam Perang Uhud.

“Peristiwa-peristiwa seumpama itu bukan sekadar sejarah Islam yang biasa tetapi juga membawa pengajaran yang amat penting jika direnungkan.

“Hikmah ibadah dan pengajaran Islam yang wujud dalam bulan yang mulia ini membantu membentuk kekuatan dalaman dan ketaatan kepada

Allah s.w.t. dan para pemimpin.

“Ini akan menjadikan kita manusia yang berjaya di dunia dan akhirat,” katanya ketika berucap pada majlis berbuka puasa dengan penduduk di Masjid An-Nur, Kampung Ketapang di sini malam ini.

Pada majlis itu, Najib turut menyampaikan bantuan dalam bentuk keperluan sambutan Hari Raya Aidilfitri kepada 45 ibu tunggal dan 27 warga emas.

Timbalan Perdana Menteri menambah, Ramadan membuka ruang kepada umat Islam untuk menyucikan roh dan semangat, justeru ia perlu diselami dengan sebaik mungkin walaupun pada hari-hari terakhir dalam bulan itu.

NAJIB Tun Razak menyampaikan sumbangan kepada warga emas, Hassan Muluk, 74, semasa majlis berbuka puasa dengan penduduk di Masjid An-Nur, Kampung Ketapang, Pekan, semalam.

